



Il schefcuschiniers dals hotels da San Murezzan e conturn che sa participeschan a l'occurranza culinaria cun ils giasts cuschiniers dal 20. Gourmet Festival.



En ina chamona da chatscha a Silvaplauna vegn Beni Klegler a cuschinar tratgas da selvaschina exquisitas.

# Ina occurrenza culinara pli che particulara

San Murezzan: Il 20. Gourmet Festival ha cumenzà

DA GION NUTEGN STGIER / ANR

■ **Gia tar l'occurranza d'avertura en ils cuschiniers ids als cunfins da la purschida culinara. Da la partida al Gourmet Festival en nov cuschiniers cun tuttina 20 stailas da «Michelin». Bunamain 400 persunas en stadas a la saira d'avertura en il hotel da luxus «Kempinski» a San Murezzan.** Il Gourmet Festival a San Murezzan e conturn entschaiva adina cun ina occurrenza nua che tut ils giasts cuschiniers envidan cuminaivel a maisa. Vesair ed esser vesì, quai è il motto tar l'uschenumnada party d'avertura da l'emna culinara en l'Engiadin'Ota. Stà il cas e quai er glindesdi saira cun in'entschatta dal Gourmet Festival sin in nivel fitg aut e quai en tuts regards. Gia dapi onns tutga l'occurranza culinara da San Murezzan e conturn tar ils gourmets tar in tip secret e vala er suenter 20 onns sco in dals pli particulars festivals per mangiabains ch'i dat sin quest mund. Ils cuschiniers internaziunals vegnan gugent en l'Engiadin'Ota cun esser quella regium l'etichetta per

persunas che mangian e baivan gugent bain. Fin tar la saira finala en l'hotel Carlton stattan bunamain 40 occurrenzas culinaricas sin il program e quai magari er en in rom pli pitschen e singular. Il success dal Gourmet Festival è segir er l'individualità da quel, quai conferman er las occurrenzas culinaricas pli pitschnas ch'èn er da preschent occupadas fitg bain.


## Ils cuschiniers fan savens experiments

Glindesdi tar la party d'avertura era tranter las 400 persunas er blera prominenz che vegn be per il Gourmet Festival a San Murezzan. Ils preschents han tuts gi l'onur da far in viadi culinaric exclusiv cun ir ils nov cuschiniers da renum davairas als cunfins da la purschida culinara. Er tar l'avertura en in rom fitg festiv han ils cuschiniers da num e pum fatg experiments e cumbinà spaisas che han insumma nagut da far ina cun l'autra. Mintga tratga fina ch'ìls cuschiniers han cuschinà aveva ses agen gust er en cumbinaziun cun in auter product. Da

cuschinar pli fin e delicat è strusch pusaiel cun esser mintga piculezza servida ina delicatessa ed ina tratga exquisita. Almain ils mangiabains èn stads inchantads e blers han confermà che fin ussa saja quella party d'avertura, quai che pertutga la purschida culinara, stada il punct culminant en 20 onns. Insumma l'entir ambient è stà fitg festiv e glamurus en las localitads da l'hotel «Kempinski», cun ina atmosfera che tutga, sch'i vegn betg spargnà, per giudair spaisas finas ed exclusivas dals megliers cuschiniers dal mund. In ulteriur punct culminant dal festival da giubileum vegn ad esser l'uschenumnà «Gourmet Festival Village» nua che la zona da peduns a San Murezzan vegn transformada en ina via culinara e nua ch'ìls cuschiniers giuvens dals hotels da luxus da San Murezzan e conturn offreschan delicatessas culinaricas per mintgin. Quella occurrenza ha lieu damaun suenter mezdi a partir da las 16.00 e tranter las 17.00 e las 18.00 vegnan er ad esser preschents ils nov stars cuschiniers che derivan da set differents naziums.



En l'hotel da luxus «Kempinski» a San Murezzan ha gi lieu la gronda party d'avertura dal festival da giubileum.



Reto Mathis, il president da las occurrenzas culinaras cun la cuschiniera da renum internaziunal Cornelia Poletto.

FOTOS SWISS-IMAGE A. METTLER



D'ir d'auca en ina pralina da rischco-tschinas han ils gourmets giudi dal cuschinier tudestg Klaus Erfort.



Delicatessas dal giast cuschinier da Hongkong Alvin Leung che ha confermà ch'ìl Gourmet Festival saja fitg internaziunal.



Massimo Bottura, da preschent il meglier cuschinier da l'Italia, ha servi «parmigiano» cun in «aceto balsamico» da 50 onns.